

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haber

BESPLATAN PRIMJERAK • SEPTEMBAR, 2023, broj 58.



**OPOZVAN NAČELNIK
IBRAHIM HADŽIBAJRIĆ
PRIJEVREMENI IZBORI
29.10.2023. GODINE**

- 7 Prijevremeni izbori za načelnika 29.10.2023. godine
- 9 Novi Pravilnik o jednokratnim naknadama za porodilje
- 10-13 Nastavljena sanacija objekata, saobraćajnica, klizišta, kaldrma
- 17 Svečano ispraćeni maturanti generacije 2014/23.
- 19 Podrška poslovnim planovima
- 20-22 Obilježavanje značajnih godišnjica



Impressum

- Izdavač:** Općina Stari Grad Sarajevo
- Pripremili:** Almedina Porča
Alma Imamović
Jasenka Jašarević
Nedim Šahović
- DTP:** Safet Mališević
- Fotografije:** Nedim Šahović
- Štampa:** Štamparija Fojnica d.d. Fojnica
- Tiraž:** 3000
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Telefon:** +387 33 282 491



Opoziv Općinskog načelnika



Na referendumu 23.07.2023. godine građani izglasali **OPOZIV** načelnika Ibrahima Hadžibajrića

Nakon provedenog referenduma CIK BiH usvojio odluku o opozivu • Referendum za opoziv iniciran nakon hapšenja načelnika Ibrahima Hadžibajrića i sekretarke Alme Destanović • Slijede prijevremeni izbori u Općini Stari Grad Sarajevo

U općini Stari Grad Sarajevo, prvi put otkako je uvedena funkcija općinskog načelnika kao nosioca izvršne vlasti u jedinicama lokalne samouprave, proveden je referendum i voljom građana opozvan načelnik Ibrahim Hadžibajrić.

Ibrahim Hadžibajrić obavljao je funkciju općinskog načelnika Općine Stari Grad Sarajevo od 2008. godine i opozvan je u toku njegovog četvrtog mandata. U narednim redovima donosimo hronološki pregled dešavanja od maja, 2023. godine, te okolnosti koje su dovele do opoziva općinskog načelnika.

Uhapšeni načelnik Hadžibajrić i sekretarka Destanović

Dana 09.05.2023. godine, u akciji kodnog naziva "Start", uhapšeni su načelnik Općine Stari Grad Sarajevo

Ibrahim Hadžibajrić i sekretarka organa državne službe Alma Destanović.

Operativno-taktička akcija "Start" koju su realizovali policijski službenici Uprave policije MUP-a Kantona Sarajevo pod nadzorom tužilaca Tužilaštva Bosne i Hercegovine i Tužilaštva Kantona Sarajevo, bila je rezultat višemjesečne intenzivne saradnje ostvarene i s međunarodnim policijskim partnerima, u prvom redu EUROPOL-om i Uredom FBI.

U akciji "Start" uhapšeni su: načelnik Općine Stari Grad Ibrahim Hadžibajrić, sekretarka organa državne službe Alma Destanović, Elmedin Karišik, Seid Hadžibajrić, Emina Rogo i Mustafa Dedić. Tužilaštvo Kantona Sarajevo ih tereti za krivična djela organizirani kriminal, zloupotreba položaja ili ovlaštenja, pranje novca, te primanje i davanje dara. Sumnjiče se da su od 2019. do maja 2023. godine Ibrahim Hadžibajrić i Elmedin Karišik, organizirali i rukovodili kriminalnom grupom čiji su članovi bili

Alma Destanović, Seid Hadžibajrić i druge osobe. Pojedini članovi grupe su međusobno komunicirali putem instalirane aplikacije Sky, kako bi prikrivali tragove i u konačnici dogovarali počinjenje krivičnih djela, saopćili su iz Tužilaštva KS, te pojasnili da se privedeni terete da su nezakonito izdavali u zakup parking prostore na području Općine Stari Grad za najmanje tri firme nad kojima su imali kontrolu i nezakonito zaradili više stotina hiljada maraka. Ibrahimu Hadžibajriću dodatno se na teret stavlja i nezakonito dodjeljivanje nekretnine jednoj osobi sa područja općine Stari Grad, od koje je primio mito u iznosu od 150.000 KM.

Na prijedlog Tužilaštva KS, Kantonalni sud u Sarajevo odredio je 12.05.2023. godine jednomjesečni pritvor Ibrahimu Hadžibajriću i Almi Destanović, potom 09.06.2023. godine produžio na dvomjesečni pritvor, a 08.08.2023. godine produžio na tromjesečni pritvor.

Osim toga, Općinski sud u Sarajevu potvrdio je optužnicu Tužilaštva Kantona Sarajevo protiv Ibrahima Hadžibajrića zbog krivičnog djela povreda prava iz radnog odnosa, prema kojoj se tereti da je od marta 2020. do marta 2021. godine nezakonito otpustio šest državnih službenika i namještenika u Općini Stari Grad.

Općinsko vijeće Stari Grad Sarajevo odmah poduzelo neophodne korake za neometano funkcionisanje Općine

Imajući u vidu da Općinski načelnik Ibrahim Hadžibajrić nije imenovao državnog službenika koji će u slučaju spriječenosti obavljati njegove poslove, a kako bi se nastavilo neometano funkcionisanje Općine, Općinsko vijeće Stari Grad Sarajevo urgentno je djelovalo. Na vanrednoj sjednici održanoj 24.05.2023. godine, Vijeće je donijelo Odluku o izboru državnog službenika za vršenje poslova iz nadležnosti Općinskog načelnika Općine Stari Grad Sarajevo.

Općinsko vijeće jednoglasno je usvojilo odluku da se za vršenje ovih poslova ovlašćuje državna službenica Mirsada Smajić, koja je do tog momenta bila postavljena na radno mjesto stručnog savjetnika u Službi civilne zaštite, dok je ranije obavljala poslove pomoćnice načelnika za urbanizam.

Rješenjem kojim je Općinsko vijeće Stari Grad dalo ovlaštenja Mirsadi



Tokom akcije start

Smajić, precizirano je da imenovana može obavljati sve poslove iz nadležnosti Općinskog načelnika koji su neophodni za nesmetano i redovno funkcionisanje Općine, rukovati i upotrebljavati pečate Općinskog načelnika, te deponovati potpis kod nadležnih institucija i poslovnih banaka u svrhu nesmetanog i redovnog funkcionisanja Općine. Ovlaštenje dato Mirsadi Smajić, Općinsko vijeće produžilo je nakon produženja pritvora načelniku Hadžibajriću.

Mirsada Smajić uputila poruku građanima

Po preuzimanju ovlaštenja za obavljanje poslova iz nadležnosti Općinskog načelnika, imenovana Mirsada Smajić uputila je poruku svim građanima informišući ih o neometanom funkcionisanju Općine.

“Poštovani građani,

kao ovlaštena osoba za obavljanje poslova iz nadležnosti Općinskog načelnika Općine Stari Grad Sarajevo, želim vas obavijestiti da se svi poslovni procesi unutar Općine Stari Grad Sarajevo, u kojima se ostvaruju osnovna prava građana, odvijaju neometano i u zakonskim rokovima. Prvenstveno želim uputiti poruku socijalno ugroženim kategorijama lica, kao i boračkoj populaciji da će sva njihova prava koja ostvaruju putem Službe za boračko-invalidsku i socijalnu zaštitu biti u potpunosti ispoštovana, te da u najskorijem roku mogu očekivati uplate naknada na koje imaju pravo.

Općina Stari Grad Sarajevo nastavit će da funkcioniše i radi u interesu građana i vaša prava bit će ispoštovana, bez obzira na okolnosti u kojima se ovaj organ uprave našao.

Želim da znate da se uvijek možete obratiti Općini Stari Grad Sarajevo sa vašim zahtjevima koji će se tretirati u skladu sa zakonom i propisima. Od svih općinskih službi, državnih službenika i namještenika očekujem da profesionalno i objektivno ispunjavaju svoje radne obaveze i interese građana stave na prvo mjesto, te postupaju u skladu sa zakonom, “navela je, između ostalog, Smajić u svom obraćanju.

Nedugo nakon preuzimanja ovlaštenja, Smajić je donijela od-



Mirsada Smajić ovlaštena za obavljanje poslova iz nadležnosti Općinskog načelnika

lu ku da od 10.07.2023. godine Općina Stari Grad ponovo otvara vrata za građane i da će se rad sa strankama odvijati svakodnevno od 09-11,00 sati

Za razliku od ranije prakse, stranke se više ne primaju samo u određenim terminima i u prostoriji za prijem stranaka u prizemlju Objekta A, nego u kancelarijama službi u kojima se rješavaju njihovi predmeti.

Opoziv Općinskog načelnika

Vijećnik Vedad Deljković pokrenuo Inicijativu za pokretanje opoziva općinskog načelnika

Općinsko vijeće Stari Grad Sarajevo održalo je 30.05.2023. godine redovnu 26. sjednicu na kojoj su se izjašnjavali o Inicijativi za pokretanje postupka opoziva općinskog načelnika Ibrahima Hadžibajrića. Predlagač inicijative bio je vijećnik Vedad Deljković. Inicijativu su podržala 23 vijećnika. Općinsko vijeće Stari Grad je nakon toga imalo rok od 30 dana da donese konačnu odluku o pokretanju opoziva.

Usvojena Odluka o pokretanju opoziva načelnika Ibrahima Hadžibajrića i zakazan referendum 23.jula, 2023. godine

Općinsko vijeće Stari Grad usvojilo je na vanrednoj sjednici održanoj 12.06.2023. godine prijedlog Odluke o pokretanju opoziva općinskog načelnika Ibrahima Hadžibajrića. Za opoziv su glasala 23 vijećnika. Prijedlog Odluke o pokretanju opoziva, Prijedlog Odluke o imenovanju Komisije za provođenje opoziva, kao i Prijedlog Uputstva za provođenje postupka opoziva, pripremio je vijećnik Vedad Deljković koji je najavio da će se referendum za opoziv održati u nedjelju 23.07.2023. godine, od 07-19,00 sati.

Vijećnik Vedad Deljković, kao i predsjedavajući Općinskog vijeća Seid Škaljić sa sjednice su uputili poruku općinskom načelniku Ibrahimu Hadžibajriću da se sam povuče i podnese ostavku kako bi se uštedjela sredstva koja su potrebna za provođenje opoziva.

“Referendum će se održati 23. jula i on će pokazati da li načelnik ima podršku građana ili nema. Moralno bi bilo da se sam povuče i podnese ostavku, da uštedi Općini Stari Grad sredstva potrebna za provođenje opoziva,” izjavio je Deljković. Predsjedavajući Škaljić



Vijećnik Vedad Deljković pokrenuo inicijativu



Vijećnici glasali za pokretanje opoziva



Odluka o uštedama

je istakao da razdvaja ličnost i funkciju općinskog načelnika, te da je činjenica da Općina Stari Grad Sarajevo, građani i postupci trpe zbog ovakve situacije. “Sugerisao sam u više navrata da bi načelnik trebao dati ostavku. Smatram da se svi političari trebaju ponašati odgovorno i ukoliko njihov rad, ili drugi vid djelovanja, ugrožava ili opstruiše normalno funkcionisanje institucija, moraju pokazati političku odgovornost za svoje postupke. Stoga, pozivam načelnika da podnese ostavku,” izjavio je predsjedavajući Škaljić.

Općinsko vijeće Stari Grad Sarajevo usvojilo je i prijedlog Odluke o imenovanju Komisije za provođenje postupka opoziva općinskog načelnika, koju su činili: Mirza Imamović (predsjednik Komisije), Maja Bjelan Karičić (zamjenica predsjednika), Suad Muzurović, Selvira Vilić, Azra Softić, Anera Junuzović Husić i Edin Avdić.

Pored toga, Općinsko vijeće Stari Grad Sarajevo usvojilo je i Uputstvo za provođenje postupka opoziva općinskog načelnika kojim se, između ostalog, uređuje: biračka mjesta, imenovanje

biračkih odbora, način kontrole i predaje izbornog materijala, brojanja glasačkih listića, te finansiranje samog postupka opoziva.

S ciljem ušteta usvojene izmjene Odluke o pokretanju opoziva općinskog načelnika

Općinsko vijeće Stari Grad Sarajevo održalo je 27.06.2023. godine 27. redovnu sjednicu na kojoj je usvojen Prijedlog odluke o izmjeni Odluke o pokretanju opoziva općinskog načelnika. Riječ je o usklađivanju iste sa Uputstvom za provođenje postupka opoziva, te izmjenama koje su utvrđene u izgledu glasačkog listića. Ranije je Odluka predviđala štampanje glasačkih listića na kojima su određeni dijelovi trebali biti u zlatotisku, a što je izmijenjeno. “Štampanje glasačkih listića u crno-bijeloj tehnici, bez dijelova u zlatotisku, će u značajnoj mjeri smanjiti troškove, a označavanjem broja biračkog mjesta u serijskom broju glasačkog listića, dodatno se sprečava

zloupotreba istog,” navedeno je u obrazloženju za donošenje ove odluke. Inače, za provođenje Odluke o pokretanju opoziva procijenjeni su troškovi u iznosu do 120.000 KM.

Komisija za provođenje postupka opoziva općinskog načelnika provela sve neophodne aktivnosti za provođenje referenduma

U periodu koji je uslijedio nakon formiranja Komisije za provođenje postupka opoziva općinskog načelnika, predsjednik i članovi Komisije proveli su sve neophodne aktivnosti potrebne za održavanje referenduma.

Građani Općine Stari Grad Sarajevo u nedjelju, 23.07.2023. godine odlučivali su o opozivu općinskog načelnika Ibrahima Hadžibajrića, što je prvi zabilježeni slučaj provođenja opoziva u Kantonu Sarajevo dosad. Glasanje se vršilo na 46 biračkih mjesta, od 07,00 sati ujutro do 19,00 navečer. Pravo glasa imalo je 36.193 glasača, a putem glasačkog listića izjašnjavali su se da li su ZA ili PROTIV opoziva općinskog načelnika.

Komisija je provela i proces štampanja glasačkih listića koji su u slučaju redovnih izbora osigurani od strane CIK-a BiH, dok je u ovom slučaju kompletnom procedurom rukovodila Komisija za provođenje opoziva. Blagovremeno je Komisija poslala preporučenu pošiljku svim glasačima koji su upisani za glasanje putem pošte. Ove pošiljke sadržavale su obrazac s ličnim podacima, odgovarajući glasački listić, povratnu kovertu s adresom Komisije i kovertu za glasački listić koja osigurava tajnost glasanja. Na spisku za glasanje putem pošte nalazilo se 587 birača.

Oni koji su zbog bolesti spriječeni da glasaju na biračkim mjestima, svoje pravo mogli su ostvariti putem mobilnih timova. Komisija je dobila 48 zahtjeva za glasanje putem mobilnih timova i formirana su 4 mobilna tima.

Održane su obuke za sve članove biračkih odbora i to na način da su pozvani članovi biračkih odbora sa svih 46 biračkih mjesta i data su im detaljna uputstva i obuke o načinu provođenja procesa.

Nijedan politički subjekt nije prijavio posmatrača za izborni proces u rokovima

koji su određeni Uputstvom za provođenje opoziva općinskog načelnika, a nije bilo prijavljenih ni međunarodnih posmatrača.

Referendum za opoziv načelnika održan 23.07.2023. godine

Dana 23.07.2023. godine u Starom Gradu održan je prvi referendum za opoziv općinskog načelnika. Biračka mjesta otvorena su u 07,00 sati, a zatvorena u 19,00 sati. Kompletna proces nadzirala je Komisija za provođenje postupka opoziva koja je potvrdila da je izborni proces protekao bez problema, a članovi Komisije su više puta obilazili sva biračka mjesta tokom dana. Nakon zatvaranja biračkih mjesta, Komisija je nastavila pratiti rad biračkih odbora. Izborni materijal sa svih biračkih mjesta

je preuzet i pravilno zapakovan prema propisima, a nakon toga distribuiran u sjedište Komisije pod policijskim nadzorom, u zaključanu i zapečaćenu prostoriju.

Dana 04.08.2023. godine Komisija za provođenje opoziva općinskog načelnika Ibrahima Hadžibajrića utvrdila je konačne rezultate glasanja građana na referendumu održanom 23. jula 2023. godine nakon objedinjavanja svih glasačkih listića sa redovnih biračkih mjesta, nepotvrđenih glasačkih listića, mobilnih timova, glasanja u odsustvu i glasanja putem pošte iz inostranstva.

Prema podacima Komisije za provođenje opoziva općinskog načelnika, na referendumu je glasalo 4.864 građana od ukupno 36.193 registrovanih. Važećih glasačkih listića je bilo 4.841, te 53 nevažeća listića.



Na jednom od biračkih mjesta

Za opoziv općinskog načelnika Ibrahima Hadžibajrića glasalo je 3.791 birač, a protiv opoziva glasalo je 1.050 birača.

Procentualno, na referendumu za opoziv općinskog načelnika Ibrahima Hadžibajrića u Starom Gradu glasalo je 13,52 % birača.

Komisija je naglasila da se cijeli proces odvijao u skladu s odredbama Uputstva za provođenje postupka opoziva općinskog načelnika, te je proveden transparentno i u skladu sa zakonskom regulativom kako bi se osigurala tačnost i vjerodostojnost rezultata referenduma.



Komisija za provođenje postupka opoziva provela sve aktivnosti

Opoziv Općinskog načelnika

Općinsko vijeće Stari Grad Sarajevo usvojilo Izvještaj o opozivu načelnika

Na vanrednoj sjednici Općinskog vijeća Stari Grad Sarajevo, održanoj 08.08.2023. godine, usvojen je Izvještaj Komisije za provođenje postupka opoziva načelnika Općine Stari Grad Sarajevo, Ibrahima Hadžibajrića, u vezi s provedenim postupkom i rezultatima izjašnjenja građana o opozivu načelnika.

Predsjedavajući Općinskog vijeća Stari Grad Sarajevo, Seid Škaljić istakao je da je Izvještaj predstavlja rezultat temeljite analize koju je provela Komisija za provedbu opoziva. Posebno je naglasio da je Izvještaj obuhvatio sve faze procedure, od imenovanja Komisije do konačnih rezultata referenduma. Općinsko vijeće je potvrdilo odluku o usvajanju Izvještaja te je kompletna dokumentacija, uključujući glasačke listiće, osjetljivi i neosjetljivi materijal, izvještaje i zapisnike, upućena Centralnoj izbornoj komisiji radi detaljne analize i konačne odluke o oduzimanju mandata načelniku Ibrahimu Hadžibajriću, te raspisivanja prijevremenih izbora.

Izvještaj o opozivu načelnika podnio Mirza Imamović, predsjednik Komisije za opoziv

Predsjednik Komisije za provođenje postupka opoziva načelnika Općine Stari Grad Sarajevo, Mirza Imamović Općinskom vijeću Stari Grad je na vanrednoj sjednici 08.08.2023. godine detaljno pojasnio tok provođenja referenduma za opoziv, kao i naredne korake: „Nakon usvajanja Izvještaja Komisije na sjednici, isti će biti prosljeđen Centralnoj izbornoj komisiji radi potvrde provedenog referenduma i postupka opoziva načelnika. Sva dokumentacija kojom je Komisija raspolagala, uključujući osjetljivi i neosjetljivi materijal, izvještaje te zapisnike, bit će dostavljena u narednim danima Centralnoj izbornoj komisiji“, naglasio je predsjednik Komisije, Imamović. Glavni cilj ovog koraka je omogućiti detaljnju analizu i provjeru zakonitosti provedenog postupka. Očekuje se da će Centralna izborna komisija, na temelju analize dostavljenih materijala, donijeti odluku o raspisivanju prijevremenih izbora unutar narednih 15 dana,“ izjavio je Imamović.



Centralna izborna komisija BiH usvojila Odluku o opozivu općinskog načelnika Ibrahima Hadžibajrića

Centralna izborna komisija Bosne i Hercegovine, na 58. sjednici održanoj 17.08.2023. godine, donijela je odluku kojom je utvrdila da je postupak opoziva načelnika Općine Stari Grad Sarajevo Ibrahima Hadžibajrića, proveden u skladu sa zakonom, te da mu mandat načelnika Općine Stari Grad Sarajevo, prestaje danom pravosnažnosti navedene odluke.

Odluka je objavljena na internet stranici Centralne izborne komisije Bosne i Hercegovine www.izbori.ba, i smatra se da je danom objavljivanja ista dostavljena svim učesnicima u opozivu načelnika Općine Stari Grad Sarajevo.

CIK je ostavio mogućnost žalbe na odluku koja se podnosi Apelacionom odjelu Suda Bosne i Hercegovine u roku od dva dana od dana prijema ove odluke preko Centralne izborne komisije Bosne i Hercegovine, u skladu sa članom 6.9 stav (1) i stav (2) Izbornog zakona Bosne i Hercegovine.

Nakon pravosnažnosti odluke, u skladu sa članom 14.3 Izbornog zakona BiH, Centralna izborna komisija BiH donosi odluku



Sa 58. sjednice CIK-a BiH

o raspisivanju prijevremenih izbora kojom se utvrđuje tačan datum održavanja izbora. Prijevremeni izbori se održavaju u roku od 90 dana od dana raspuštanja izabranog organa, odnosno prestanka mandata u skladu sa ustavom i zakonom. Od dana raspisivanja prijevremenih izbora do dana održavanja iz-

boru ne može proteći manje od 30 niti više od 90 dana i mandat članova organa izabranih na prijevremenim izborima traje do isteka tekućeg mandata organa izabranih na redovnim izborima – navedeno je u saopćenju objavljenom na zvaničnoj internet stranici Centralne izborne komisije.

Prijevremeni izbori za načelnika Općine Stari Grad održat će se 29.10.2023. godine

CIK BiH usvojio Uputstvo o rokovima izbornih aktivnosti za održavanje prijevremenih izbora za načelnika Općine Stari Grad ● Ukupan broj upisanih birača je 36.237 ● Budžet za održavanje prijevremenih izbora 89.500 KM



59. sjednica Centralne izborne komisije Bosne i Hercegovine

Centralna izborna komisija BiH je na 59. sjednici održanoj 30.08.2023. godine jednoglasno usvojila Odluku o raspisivanju i održavanju prijevremenih izbora za načelnika Općine Stari Grad Sarajevo.

Prijevremeni izbori za načelnika Općine Stari Grad Sarajevo će se održati u nedjelju 29.10.2023. godine, a Općina Stari Grad Sarajevo je dužna osigurati finansijska sredstva u skladu sa odredbama Izbornog zakona u roku od 15 dana od dana donošenja ove odluke i ista uplatiti na jedinstveni račun Trezora BiH.

CIK BiH usvojio je i Prijedlog Uputstva o rokovima izbornih aktivnosti za održavanje prijevremenih izbora za načelnika Općine Stari Grad Sarajevo kojim su definisani najznačajnijih rokovi izbornih radnji, pa će se tako prijave za ovjeru političkih stranaka i nezavisnih kandidata vršiti zaključno sa 04.09.2023. godine, a zahtjevi za ovjeru koalicija do 12.09.2023. godine do 16,00 sati. Novi

birači koji će glasati izvan BiH imaju rok za prijavu do 19.09.2023. godine, odnosno 20 dana od dana raspisivanja prijevremenih izbora.

CIK BiH usvojio je i Odluku o zaključivanju i potvrđivanju broja upisanih birača u Centralni birački spisak za prijevremene izbore za načelnika Općine Stari Grad Sarajevo na dan 29.08.2023. godine u 24 h. Ukupan broj upisanih birača je 36.237.

Jednoglasno je usvojen je i Prijedlog Zaključka o usvajanju namjenske strukture troškova – Budžet programa posebnih namjena – prijevremeni izbori za načelnika Općine Stari Grad Sarajevo u ukupnom iznosu od 89.500 KM. Naglašeno je da će biti korišten papir sa vodenim žigom iz skladišta CIK-a BiH koji je nabavljen za lokalne zборе 2020. godine.

Naglašeno je da izborni period počinje teći od 30.08.2023. godine i traje do potvrđivanja rezultata prijevremenih izbora.

Osigurana sredstva za prijevremene izbore, Mirsada Smajić imenovana za v.d. načelnika

Općinsko vijeće Stari Grad Sarajevo održalo je 07.09.2023. godine vanrednu sjednicu na kojoj je jednoglasno podržan prijedlog Rješenja o imenovanju Mirsade Smajić za vršioca dužnosti načelnika Općine Stari Grad Sarajevo, a dužnost će obavljati do okončanja postupka prijevremenog izbora načelnika. Vijeće je usvojilo i Prijedlog Odluke o izmjenama i dopunama budžeta Općine Stari Grad Sarajevo za 2023. godinu čime su osigurana potrebna sredstva za provođenje prijevremenih izbora za općinskog načelnika. Budžetom Općine Stari Grad za 2023. godinu planirana su sredstva u iznosu od 20.000 KM za Općinsku izbornu komisiju Stari Grad, a donesenom odlukom obezbijedena su i nedostajuća sredstva u iznosu od 155.000 KM, te je ukupan iznos za provođenje prijevremenih izbora 175.000 KM.

Općinsko vijeće

26. sjednica

Općinskog vijeća

Općinsko vijeće Stari Grad Sarajevo na je 26. redovnojsjednici, između ostalog, razmatralo tačku pod nazivom "Razmatranje aktuelne situacije u Općini Stari Grad Sarajevo. Općinsko vijeće je u sklopu ove tačke jednoglasno usvojio više zaključaka koji za cilj imaju još efikasniji rad Općinske administracije i Općinskog vijeća u predstojećem periodu.

U nastavku 26. sjednice općinski vijećnici jednoglasno su podržali Prijedlog Odluke o izmjeni i dopuni Odluke o zakupu stanova u vlasništvu Općine Stari Grad Sarajevo. Zahvaljujući ovom izjašnjenju,



Vijećnik Emir Bićo predložio izmjene Odluke o dodjeli stanova

davat će se prednost porodicama koje imaju dijete ili odraslu osobu sa poteškoćama u razvoju i stepenom invalidnosti višem od 50% prilikom predavanja zahtjeva za zakup općinskih stanova. Radi dalje dorade povučen je Prijedlog Odluke o učešću u finansiranju rada klubova vijećnika političkih stranaka, nezavisnih vijećnika i samostalnih vijećnika u Općinskom vijeću Stari Grad Sarajevo. Vijećnica Emina Kiseljaković upozнала je Općinsko vijeće Stari Grad da napušta Klub vijećnika Narodni evropski savez (NES), te će ubuduće djelovati kao nezavisni vijećnik.

27. sjednica

Općinskog vijeća

Općinsko vijeće podržalo je Nacrt odluke o izmjeni i dopuni Odluke o dodjeli i prodaji stanova kojima raspolaže Općina Stari Grad. U obrazloženju za donošenje ove odluke navedeno je da se ukazala potreba za usklađivanjem važeće odluke sa odredbama Zakona o principima lokalne samouprave u FBiH kojim je jasno propisano da Vijeće odlučuje o pribavljanju, korištenju, upravljanju i raspolaganju imovinom jedinice lokalne samouprave, dok je važećom Odlukom izostavljena nadležnost Općinskog vijeća. Nacrt odluke je upućen u javnu raspravu u trajanju od 15 dana.

Na prijedlog vijećnice Šejle Uzunović Pita, Općinsko vijeće je podržalo prijedlog zaključka kojim se od Službe za privredu traži da pripremi izmjene Odluke o dodjeli u zakup poslovnih zgrada i poslovnih prostora Općine Stari Grad Sarajevo i rasporedu poslovnih djelatnosti na području općine Stari Grad Sarajevo, a u skladu sa federalnom Uredbom o zaštiti starih i tradicionalnih zanata. Predložene su izmjene ili brisanje člana 11, stav 2 navedene Odluke u korist zakupoprimalaca - starih zanatlija.



Vijećnica Uzunović Pita predložila izmjene odluke o dodjeli PP-a

28. sjednica

Općinskog vijeća

Na početku sjednice, Općinsko vijeće Stari Grad Sarajevo je izabralo Maju Bjelan – Karičić za člana Općinske izborne komisije Stari Grad Sarajevo, a Mirzu Imamovića za sekretara Općinske izborne komisije. Također, usvojeno je Rješenje o njihovom imenovanju u OIK Stari Grad. Tokom sjednice, mandat samostalnog vijećnika Huseina Holjana je verificiran.

Usvojena je Odluka o izmjenama i dopunama odluke o dodjeli i prodaji stanova kojima raspolaže Općina Stari Grad Sarajevo. Ova inicijativa je proizašla iz prijedloga vijećnika Emira Biće, s ciljem usklađivanja postojeće odluke sa Zakonom o lokalnoj samoupravi Federacije Bosne i Hercegovine, posebno u dijelu koji se odnosi na nadležnosti Općinskog vijeća. Nova odluka omogućava pojednostavljenu proceduru aplikantima i gradi povjerenje građana u instituciju Općine Stari Grad. Osim toga, stvara ravnopravnost u ostvarivanju prava građana, što predstavlja ključan korak prema transparentnijem i učinkovitijem radu lokalne zajednice.



Imenovani članovi OIK-a Stari Grad

Izmijenjen Pravilnik o dodjeli jednokratnih novčanih naknada porodiljama

Uvećane naknade za porodilje, od 500 – 1.500 KM • Više od million KM dodijeljeno porodiljama u posljednjih 10 godina • Vijeće jednoglasno usvojilo novi Pravilnik



Naknade - čestitke porodiljama dodjeljuju se više od 20 godina

Na prijedlog vijećnice Merime Arnautović, Općinsko vijeće Stari Grad Sarajevo je jednoglasno usvojilo prijedlog Pravilnika o dodjeli jednokratne novčane naknade porodiljama. Novim Pravilnikom o dodjeli jednokratne novčane naknade porodiljama, za prvo i drugo novorođeno dijete naknada iznosi 500 KM, dok je ranije iznosila 300 KM. Za treće i svako naredno novorođeno dijete, naknada iznosi 750 KM, dok je ranije iznosila 450 KM. Također, porodicama koje dobiju blizance bez obzira na broj djece u porodici, predviđena je naknada od 1.500 KM. Ranije je ta naknada iznosila 600 KM ukoliko porodica nema prethodno dijete, a dobije blizance, dok su porodice koje su već imale jedno ili više djece, a dobile su blizance, dobijale 750 KM.

Novim Pravilnikom, također je uvedeno da porodilji koja rodi mrtvo dijete ili dijete umre u roku od 60 dana od dana rođenja, pripada pravo na jedokratnu novčanu naknadu u iznosu od 1.000 KM. Ovaj Pravilnik stupio je na snagu osam dana od dana objavljivanja u Službenim novinama Kantona Sarajevo.

Sredstva za realizaciju povećanja naknada obezbijedena su rebalansom budžeta Općine Stari Grad Sarajevo za 2023. godinu.

Podsjećamo da je Općina Stari Grad Sarajevo još prije dvadesetak godina postala prva Općina u Kantonu Sarajevo koja je krenula u pružanje konkretne pomoći porodiljama. Podaci nadležne Službe za boračko-invalidsku i socijalnu zaštitu Općine potvrđuju uspješnost ove prakse. Posljednjih deset godina, porodilje u općini Stari Grad Sarajevo primile su više od milion KM podrške.



Vijećnica Merima Arnautović predložila uvećanje naknada

Općina Stari Grad Sarajevo predstavlja primjer lokalne zajednice koja daje podršku onima kojima je to najpotrebnije, te doprinosi boljem standardu stanovnika, posebno mladih porodica i roditelja novorođene djece. U 2022. godini su pravo na jednokratne novčane pomoći u Starom Gradu ostvarile 244 porodilje, za što je iz budžeta izdvojeno 87.750 KM. Za sufinansiranje troškova vantjelesne oplodnje izdvojeno je 15.000 KM.

Infrastruktura

Nastavljena sanacija objekata, saobraćajnica, klizišta, kaldrma

Bolji uslovi u OŠ "Edhem Mulabdić" • Sanirane i asfaltirane 4 ulice, radi se u još dvije • Stabilizacija tla u mjesnoj zajednici Toka-Džeka



OŠ "Edhem Mulabdić" jedna od najstarijih odgojno-obrazovnih institucija u Kantonu Sarajevo

Na prostoru općine Stari Grad Sarajevo prethodnih mjeseci pokrenuto je nekoliko značajnih projekata iz oblasti infrastrukture koji će omogućiti bolje uslove na saobraćajnicama, ali i osigurati bolju uslovnost objekata, stepeništa i kladrma, te zaustaviti klizanje tla. Na narednim stranicama donosimo pregled projekata koji su realizovani, kao i onih koji su u toku.

Osnovna škola „Edhem Mulabdić“ dobila nove prozore, u planu i nova fasada – projekat vrijedan pola miliona KM

Osnovna škola „Edhem Mulabdić“ koja se nalazi u ulici Konak, jedna je od najstarijih odgojno-obrazovnih ustanova u Kantonu Sarajevo, a sam objekat bio je u dosta lošem i nefunkcionalnom stanju.

Kako bi se to promijenilo, prije nekoliko mjeseci pokrenut je projekat 'utopljanja' objekta u sklopu kojeg je na školi ugrađeno 86 novih prozora i izvršeno unutrašnje utopljanje učionica i prostorija unutar škole.

Projekat je rezultat zajedničke inicijative Općine Stari Grad Sarajevo i Ministarstva za odgoj i obrazovanje Kantona Sarajevo, a njegova ukupna vrijednost je oko pola miliona KM. Sredstva za realizaciju obezbijedilo je resorno ministarstvo dok je Općina Stari Grad osigurala projektno-tehničku dokumentaciju, potrebne dozvole i provela postupak izvođača radova i nadzornog organa.

Kako bi objekat škole bio u potpunosti završen preostalo je još da se uradi tekuće održavanje fasade, a Općina Stari Grad je putem Službe za lokalni razvoj i poslove mjesnih zajednica osigurala potrebnu tehničku dokumentaciju, te za tu fazu projekta ishodovala kod Zavoda za zaštitu spomenika FBiH, pri Ministarstvu kulture i sporta FBiH, odobrenje za radove.



Projekat vrijedan pola miliona KM



Nova stolarija u OŠ "Edhem Mulabdić"

Izvršena sanacija ulice Jekovac

U mjesnoj zajednici Kovači uspješno je realizovan projekat sanacije dijela ulice Jekovac koji je obuhvatao obnovu oko 190 metara ove ulice, počevši od raskrsnice sa ulicom Kovači.

U sklopu radova izvršeno je uklanjanje starog asfalta, ravnanje i tamponiranje terena, a šahtovi i šiberi su izdignuti na potrebnu visinu kako bi se osiguralo ispravno odvodnjavanje. Nakon toga, cijela ulica je asfaltirana. Vrijednost ove investicije, u potpunosti finansirane iz općinskog budžeta, iznosila je oko 44.000 KM.

Asfaltirana ulica Nova Baruthana na Mošćanici

U mjesnoj zajednici Mošćanica izvršena je sanacija i asfaltiranje oko 200 metara ulice Nova Baruthana i to od broja 31 do broja 44. Ulica Nova Baruthana, koja prolazi kroz novo naselje u Starom Gradu, predstavlja jednu od novijih ulica u tom području. Sa oko 80 domaćinstava i stalno

rastućim brojem stambenih jedinica, ulica je doživjela značajan porast stanovnika u proteklom periodu. Ova sanacija je samo jedan od niza projekata koje je lokalna zajednica zajedno sa građanima inicirala kako bi unaprijedili kvalitet života svojih stanovnika. U proteklom periodu, već je izvršeno asfaltiranje nekoliko dijelova ulice Nova Baruthana, što pokazuje kontinuiranu predanost lokalne zajednice u poboljšanju infrastrukture u Starom Gradu. Projekat je koštao oko 56.000 KM.

Sanacija klizišta u ulici Krka

U ulici Krka kod broja 11, mjesna zajednica Toka-Džeka, prema projektu koji je izradio Institut za geotehniku i geologiju Građevinskog fakulteta Univerziteta u Sarajevu, sanirano je klizište. Kako se radi o vrlo nepristupačnom terenu, izvođenje radova bilo je izuzetno otežano. Jedan od značajnih uzroka nastanka samog klizišta su podzemne i infiltracione vode, a što se pokazalo i prilikom samih radova, jer se i tada pojavila voda. Ipak, uspješno je izvršeno njeno adekvatno preusmjeravanje, uprkos izuzetno nestabilnim vremenskim

prilikama. Zbog veoma strmog prirodnog nagiba terena, isti je zasijecan na više mjesta u cilju obezbjeđenja sigurnog prilaza i dovoza građevinskog materijala. Projektom sanacije gornja dionica klizišta sanirana je izgradnjom potpornog armirano-betonskog zida sa masivnom temeljnom stopom kao kontrategom. Donja dionica klizišta je sanirana armirano-betonskom kostrukcijom sa unakrsnim gredama usidrenim u teren, te potpornim zidom u podnožju.

Vrijednost ugovorenih radova iznosila je oko 140.000 KM. Općina Stari Grad Sarajevo je izdvojila 20.000 KM, dok je preostali dio sredstva osiguran od Zavoda za izgradnju KS.

Novi asfalt u ulici Prijepoljčeva

Izvršena je sanacija dijela ulice Prijepoljčeva u mjesnoj zajednici Kovači, na dionici u dužine 50 metara. Prvi korak je uključivao uklanjanje oštećenog asfalta kako bi se stvorila čvrsta i stabilna podloga za daljnje radove. Posebna pažnja posvećena je unapređenju odvodnje ulice putem instalacije novih poklopaca, dodatnih šahtova i šibera..



Jekovac



Nova Baruthana



Krka



Prijepoljčeva

Infrastruktura

Projekat, koji je koštao 23.500 KM, finansiran je iz budžeta Općine Stari Grad Sarajevo.

Sanirano oko 50 metara ulice Abdesthana na Kovačima

Prema informacijama nadležne Službe za investicije i komunalne poslove Općine Stari Grad, tokom mjeseca augusta, 2023. godine, sanirana je i ulica Abdesthana na Kovačima, u dužini oko 50 metara, od broja 3 do broja 30. Projekat je obuhvatao uklanjanje dotrajalih slojeva asfalta, izradu tamponskog sloja, ugradnju dvije slivne rešetke, postavljanje dva slivnika, tri šahta i završno asfaltiranje. Cijena ovih radova iznosila je oko 18.100 KM. Podsjećamo, 2022. godine urađena je sanacija na dijelu ulice Abdesthana od broja 25 do broja 33, u dužini od oko 60 metara.

Sanacija Apelove ceste

Završavaju se radovi na sanaciji Apelove ceste, na Trebeviću. Ovaj značajan projekat pokrenut je u saradnji Općine Stari Grad Sarajevo i Direkcije za puteve Kantona Sarajevo. Kasnije se uključio i Grad Sarajevo koji je realizovao projekat uvođenja kanalizacione mreže duž trase ceste. Završetkom tog dijela projekta, nastavilo se s sanacijom i asfaltiranjem ceste, dužine oko 900 metara.

Ova cesta ima poseban značaj za građane Sarajeva, jer predstavlja direktnu i najkraću rutu do planine Trebević, bez korištenja putne infrastrukture manjeg bh entiteta. Potpisani sporazum o saradnji sa Direkcijom za ceste KS osigurao je sredstva od 400.000 KM za radove na ovom projektu. Općina Stari Grad Sarajevo je osigurala projektnu dokumentaciju, provela izbor izvođača radova i dodatno obezbijedila 34.000 KM za njihovu realizaciju.

Nova kaldrma u ulici Kačanik veliki

U ulici Kačanik veliki, na području mjesne zajednice Hrid – Jarčedoli, sanirana je kaldrma s ciljem osiguranja bezbjednosti građana koji koriste ovo



Abdesthana



Apelova cesta



Kačanik veliki



Bostarići

stepenište. Kaldrma je sanirana na dijelu ulice od broja 8 do broja 16 u dužini od 27 metara, širine od 1.6 metara do 5,0 metara.

Stara kaldrma bila je dosta oštećena i opasna za kretanje, posebno djeci i starijim osobama, a poseban problem bilo je kretanje u zimskom periodu usljed poledice i snijega. Uklanjanjem stare kaldrme i sanacijom svih oštećenja vraćena je bezbjednost građanima i osigurani puno bolji uslovi. Projekat sanacije kaldrme u ulici Kačanik veliki koštao je oko 25.000 KM.

Sanirano stepenište u ulici Bostarići

U ulici Bostarići, u mjesnoj zajednici Širokača izvršena je sanacija stepeništa. Obnovljeno je stepenište do broja 9, a ukupni trošak radova iznosio je oko 11.000 KM. Stepenište je dužine 38 metara i širine 1,5 metara. Zahvaljujući izvedenim radovima, stepenište je sada sigurno i funkcionalno.

Sanacija ulica Budžak, Okrugla i dio ulice Bistrik

Sanirana je ulica Budžak, u mjesnoj zajednici Bistrik. Na dijelu ulice dužine cca 200 metara uklonjen je stari, dotrajali asfalt, kao i stari ivičnjaci. Izvršeno je asfaltiranje, postavljanje novih ivičnjaka, te podizanje i nivelisanje 16 postojećih šahtova kako bi se osigurala njihova

funkcionalnost i sigurnost saobraćaja. Na dijelu saobraćajnice izgrađen je i jedan manji potporni zid radi stabilizacije terena. Projekat je koštao 125.000 KM.

Inače, radovi u ulici Budžak dio su ugovorenih radova sa izvođačem Grakop d.o.o. iz Kiseljaka koji uključuju i sanaciju ulice Okrugla, te dijela ulice Bistrik. Ukupno će sanacija sve tri ulice koštati 420.000 KM i finansirat će se iz budžeta Općine Stari Grad Sarajevo.

Sanirano više od 300 metara ulice Ablakovina na Širokači, počinje sanacija ulice Žagrići

Na Širokači je izvršena sanacija ulice Ablakovina, u dužini oko 330 metara. Prije asfaltiranja na dijelu ulice u dužini od 330 metara uklonjena je stara i oštećena asfalna površina, te izgrađen jedan potporni zid koji je omogućio stabilizaciju terena. Projekat je uključivao i izradu drenaže, slivnih rešetki, šibera i šahtova.

Sanacijom ulice Ablakovina osigurani su bolji uslovi za stanovnike ove padinske ulice u Starom Gradu, koji su dobili mnogo kvalitetniju putnu infrastrukturu za sigurniji i lakši pristup svojim stambenim objektima.

Općina Stari Grad je za ovaj projekat iz budžeta izdvojila oko 119.000 KM. Projekat sanacije ulice Ablakovina sastavni je dio Ugovora Lot 1-2, u okviru kojeg je planirana i sanacija ulica Zabeglukom i Žagrići.



Budžak

Nove lokacije za sigurno odlaganje elektroničkog otpada

Novi kontejneri za sigurno odlaganje elektroničkog otpada postavljeni su na još dvije lokacije u Starom Gradu. Kontejneri su postavljeni u ulici Telali, kod autobusnog stajališta, i u ulici Dženetića čikma, na spoju sa ulicom Niže banje. U ove specijalizovane kontejnere mogu se odložiti uređaji kao što su laptopi, telefoni, punjači, pegle, električne igračke, muzička oprema, alati, različiti instrumenti, kuhinjski aparati i slično. Ranije su slični kontejneri postavljeni u ulici Zelenih beretki, ulici Bistrik (kod broja 50) i ulici Safvet-bega Bašagića (kod broja 69).



Ablakovina

Saradnja

Potpisivanjem sporazuma dogovoreni značajni projekti

Čišćenje Bistričkog potoka, oprema za Službe spašavanja i zaštite • Dobra saradnja sa resornim ministarstvima i kantonalnom upravom Civilne zaštite

Potpisivanjem sporazuma sa drugim nivoima vlasti, osigurana su sredstva i utvrđeni uslovi realizacije značajnih projekata za građane Općine Stari Grad Sarajevo. Među tim projektima je i čišćenje i uređenje Bistričkog potoka, kao i nabavka opreme za općinske službe zaštite i spašavanja. Višegodišnji napor za iznalaženje rješenja za stanovnike Mošćanice koji nisu bili u mogućnosti izvršiti legalizaciju svojih stambenih objekata, konačno su urodili plodom usvajanjem Odluke o zaštiti dijela otvorenog toka rijeke Mošćanice. Opširnije u narednim redovima.

Potpisan sporazum o uređenju i čišćenju korita Bistričkog potoka

Općina Stari Grad Sarajevo, Ministarstvo privrede Kantona Sarajevo i Zavod za izgradnju Kantona Sarajevo potpisali su sporazum o sufinansiranju projekta uređenja i čišćenja otvorenog korita Bistričkog potoka sa formiranjem akumulacije za zadržavanje nanosa.

Sporazum su potpisali Mirsada Smajić, ovlaštena za vršenje poslova Općinskog načelnika Općine Stari Grad Sarajevo, ministar privrede Kantona Sarajevo Zlatko Mijatović i direktorica Zavoda za izgradnju KS Belma Barlov.

Prema sporazumu, Ministarstvo privrede Kantona Sarajevo sufinansirat će projekat iznosom od 200.000 KM, a Općina Stari Grad se obavezala da će osigurati preostala novčana sredstva potrebna za realizaciju projekta, pribaviti potrebna odobrenja i saglasnosti i provesti postupak izbora najpovoljnijeg ponuđača za izvođenje radova. Stručni nadzor nad realizacijom projekta vršit će Zavod za izgradnju KS.



Sa potpisivanja sporazuma u Ministarstvu privrede Kantona Sarajevo



Mirsada Smajić sa Dženanom Brkanićem direktorom Kantonalne uprave civilne

Nabavka opreme za općinske službe spašavanja i zaštite: Potpisana tri važna ugovora

Mirsada Smajić, ovlaštena za vršenje poslova iz nadležnosti općinskog načelnika i Dženan Brkanić, direktor Kantonalne uprave civilne zaštite Kantona Sarajevo, potpisali su početkom augusta ove godine tri značajna ugovora o nabavci opreme koja će služiti za opremanje općinskih službi za medicinsku



Dom zdravlja Stari Grad

pomoć, za zaštitu i spašavanje od rušenja, te za zaštitu od požara. Ukupna vrijednost ovih ugovora iznosi 35.000 KM.

Posebno je važno istaknuti da je Služba za civilnu zaštitu Općine Stari Grad Sarajevo uspješno aplicirala prema Kantonalnoj upravi civilne zaštite, te je dobila sredstva koja će omogućiti nabavku navedene opreme. Zahvaljujući tim sredstvima, Služba za medicinsku pomoć - JU Dom zdravlja Kantona Sarajevo – Organizaciona jedinica Dom zdravlja Stari Grad dobit će finansijska sredstva u iznosu do 18.000 KM za nabavku medicinske opreme. Udruženje Vatrogasno društvo „Vratnik“ Sarajevo će dobiti finansijska sredstva u iznosu do



Otvorena mogućnost za legalizaciju objekata u donjem toku rijeke Moščanice

13.000 KM za nabavku opreme koja će omogućiti bolju zaštitu od požara, dok će „Klico trans gradnja“ d.o.o. Sarajevo dobiti finansijska sredstva u iznosu do 4.000 KM za nabavku opreme za zaštitu i spašavanje od rušenja.

Ova podrška će osigurati da općinske službe za medicinsku pomoć, za zaštitu i spašavanje od rušenja, te za zaštitu od požara budu bolje opremljene za suočavanje s raznim situacijama i izazovima u svojim nadležnostima.

Usvojene izmjene Odluke o zaštiti dijela otvorenog toka rijeke Moščanice

Skupština Kantona Sarajevo usvojila je na osmoj radnoj sjednici održanoj 03.07.2023. godine Odluku o izmjenama i dopuni Odluke o zaštiti planinskih izvorišta vode za piće sarajevskog vodovodnog sistema i dijela otvorenog toka rijeke Moščanice. Ovim izmjenama bitno se utiče na određena urbanistička rješenja i potrebe Općine Stari Grad Sarajevo u oblasti prostornog uređenja i urbanizma, te otvara mogućnost za legalizaciju objekata sagrađenih na navedenom lokalitetu.



Elaborat zaštite otvorenog toka rijeke Moščanice

Izmjene Odluke o zaštiti planinskih izvorišta vode za piće sarajevskog vodovodnog sistema i dijela otvorenog toka rijeke Moščanice inicirala je Općina Stari Grad Sarajevo koja je resornom kantonalnom ministarstvu dostavila inicijativu, kao i Elaborat zaštite otvorenog toka rijeke Moščanice kao vodnog resursa na potezu izvorište Moščanice – vodozahvat Faletići, Općina Stari Grad” još prije 2,5 godine. Elaborat je pokazao da se ot-

Dužina rijeke Moščanice je 6 km

Moščanica je desna pritoka rijeke Miljacke i oduvijek je bila od ogromne važnosti za Sarajevo i njegove stanovnike, što potvrđuje i činjenica da prvi zapisi o Moščanici sežu čak u srednji vijek.

Dolaskom Osmanlija u Bosnu počinje intenzivniji razvoj grada Sarajeva, te se pojavljuje i potreba za pitkom vodom. Počinje izgradnja javnog vodovoda i javnih česmi, a za tu namjenu je, zbog svoje blizine i nedirnute čistoće, bila najpogodnija rijeka Moščanica. U periodu 1478. do 1540. godine bosanski sandžakbeg Skender-beg je, za potrebe tadašnjih stanovnika, prema gradu, u dužini od 3 kilometra, sproveo jedan rukavac rijeke Moščanice preko naselja Vratnik. Ukupna dužina rijeke Moščanice je oko 6 km.

voreni tok rijeke Moščanice, zbog nivoa zagađenja, ne može koristiti kao voda za piće sarajevskog vodovodnog sistema, te da se ista treba isključiti. Konstatovano je da se voda iz otvorenog toka rijeke Moščanice inače I NE KORISTI kao voda za piće u sarajevskom vodovodnom sistemu, te da se I PRAVNO treba regulisati to stanje isključivanjem otvorenog toka rijeke Moščanice iz pravnih akata kojima se uređuje ovo pitanje.

Saradnja



Sa potpisivanja Sporazuma o saradnji između Grada Sarajeva i gradskih općina

Općinsko vijeće Stari Grad Sarajevo u februaru ove godine uputilo je zaključak Skupštini Kantona Sarajevo i Ministarstvu za komunalnu privredu, infrastrukturu, prostorno uređenje, građenje i zaštitu okoliša KS zaključak kojim se traži hitno poduzimanje aktivnosti za izmjenu Odluke o zaštiti planinskih izvora vode za piće sarajevskog vodovodnog sistema i dijela otvorenog toka rijeke Mošćanice donesene 1997. godine ("Službene novine KS", br:22/97). Ovaj zaključak su vijećnici jednoglasno usvojili na 22. redovnoj sjednici Općinskog vijeća Stari Grad održanoj 26.01.2023. godine.

Kako je navedeno u Odluci koju je usvojila Skupština KS, zadužuju se Vlada KS, Ministarstvo privrede KS, općine na području KS, KJKP "Vodovod i kanalizacija" i drugi operatori vodovodnog sistema koji djeluju u općinama koje nisu u sistemu sarajevskog vodovodnog sistema, da u roku od godinu dana od stupanja na snagu ove odluke izrade elaborate sa tačnim opisima granica zaštitnih zona sanitarne zaštite planinskih izvorišta vode za piće sarajevskog vodovodnog sistema i općinskih vodovodnih sistema, a u skladu sa Pravilnikom o načinu utvrđivanja uslova za određivanje zona sanitarne zaštite i zaštitnih mjera za izvorišta vode za javno vodosnabdijevanje stanovništva.

Rijeka Mošćanica će se i dalje štiti

važnim federalnim i kantonalnim propisima o zaštiti voda. Međutim, sve što je izvan koridora od 15 metara od obala rijeke, steći će uslov da se kroz urbanistička rješenja, putem novog Urbanističkog plana i novih regulacionih planova uredi u skladu sa urbanističkim pravilima i mjerilima, a što će u konačnici dovesti do mogućnosti legalizacije svih objekata koji se budu mogli legalizovati.

Općina podržala aplikaciju Grada Sarajeva za Evropsku prijestolnicu mladih 2026. godine

Potpisivanjem Sporazuma o saradnji između Grada Sarajeva i gradskih općina, Općina Stari Grad Sarajevo dala je podršku aplikaciji grada Sarajeva za Evropsku prijestolnicu mladih 2026. godine i iskazala spremnost za kreiranje boljih uslova za mlade. U ime Općine Stari Grad Sarajevo sporazum je potpisala Mirsada Smajić, ovlaštena za vršenje poslova iz nadležnosti Općinskog načelnika.

Titulu Evropske prijestolnice mladih svake godine dodjeljuje najveća platforma omladinskih organizacija u Evropi,



Sporazumom potpisanim između Federalnog ministarstva kulture i sporta i Općine Stari Grad Sarajevo odobren je iznos od 4.000 KM za projekat "Stvaranje mogućnosti za mlade: Izrada Strategije za mlade" koji je pripremila Služba za lokalni razvoj i poslove mjesnih zajednica i aplicirala prema resornom ministarstvu. Prva Strategija za mlade Općine Stari Grad Sarajevo je kreirana 2012. godine i istekla je 2017. godine. Iz tog razloga, Općina Stari Grad Sarajevo želi pokrenuti novi projekat kreiranja omladinske politike u cilju poboljšanja njihovog položaja.

Evropski forum mladih. Gradovi finalisti za 2026. godinu pokazali su posvećenost mladima, kontinuirano ulaganje i integriranje mladih u svakodnevni gradski život. Među pet finalista se nalaze gradovi Sarajevo, Izmir, Malaga, Tromsø i Vila do Conde.

Svečano ispraćeni maturanti Općine Stari Grad Sarajevo, generacija 2014/23.

Ukupno 279 učenika završilo osnovne škole u Starom Gradu • Maturanti se oprostili uz emotivne poruke za nastavnike i školske prijatelje



Svečanim defileom od trga Prve brigade policije Stari Grad kroz najuže starogradsko jezgro i prigodnim programom u Domu Oružanih snaga, svečano su ispraćeni maturanti Općine Stari Grad Sarajevo, generacija 2014/23. Ukupno 279 učenika završilo je osnovne škole u Starom Gradu, a čak 113 maturanata zaslužilo je priznanje Ponos škole jer su od I-IX razreda imali odličan uspjeh i primjereno vladanje.

U ime Općine Stari Grad Sarajevo maturante su pozdravili i uručili im plakete Enida Osmanagić po ovlaštenju pomoćnica načelnika za obrazovanje, kulturu i sport i Senad Musić, stručni savjetnik u Službi za obrazovanje, kulturu i sport.

“Prije svega čestitam vam na ostvarenim uspjesima. Od malenih pupoljaka kakvi ste došli u prve razrede osnovnih škola izrasli ste u prelijepo cvjetove, prelijepo mladiće i djevojke spremne za nove izazove i pobjede. Vjerujem da

ste u starogradskim osnovnim školama naučili biti prije svega plemeniti i vrijedni ljudi i da ste stekli čvrste temelje znanja koje ćete nadograditi u srednjim i visokoškolskim ustanovama,” poručila je Osmanagić.

Naučili smo da radimo i budemo odgovorni

A, maturanti su se kroz veoma emotivne poruke oprostili od svojih nastavnika i školskih prijatelja. „Danas smo se okupili kako bismo zajedno proslavili veliki uspjeh – završetak osnovne škole. Tokom ovog perioda naučili smo da radimo u timu, da budemo odgovorni, da se suočavamo sa izazovima i da sami tražimo rješenja. Za sve to zahvalnost dugujemo prije svega roditeljima i nastavnicima koji su nas vodili kroz ove važne godine našeg života. Posebno se zahvaljujem Općini Stari Grad Sarajevo na konstantnoj podršci i pomoći koju je ova lokalna zajednica pružala našoj školi.

Ovaj trenutak predstavlja prekretnicu u našim životima i otvara vrata ka novim mogućnostima“, izjavio je maturant Aid Šabanović iz Osnovne škole „Hamdija Kreševljaković“.

Maturantica Hena Selimbegović iz OŠ „Šejh Muhamed ef. Hadžijamaković“ zahvalila se roditeljima i nastavnicima, te kazala da iza njih ostaju lijepe uspomene koje će zauvijek pamtili.

„Veliko hvala svima koji su bili uz nas, te svojom brigom, pažnjom, razumijevanjem i savjetima bili naša podrška. Ostat ćemo upamćeni kao generacija koja je dio školovanja provela online, ali smo tu i ostale poteškoće pretvorili smo u dodatno iskustvo. Ohrabreni smo da se dalje borimo sa ocjenama i znanjem i da budemo uporni u ostvarivanju naših ciljeva“, poručila je Hena Selimbegović.

Po završetku programa i uručenja plaketa za najbolje učenike, upričljen je koktel za sve maturante, direktore, nastavnike i roditelje, uz veliku tortu njima u čast.

Obrazovanje, kultura, sport



Žuta tabija i ovog ljeta jedna je od najposjećenijih lokacija u Starom Gradu

Festival Sarajevo Sevdah Soiree obogatio turističku i kulturnu ponudu grada ● Afirmisana tradicionalna bosanska sevdalinka ● Svdah se vratio u mahale

Vrhunskim koncertima sevdaha kojim se afirmiše i čuva tradicionalna bosanska sevdalinka, Žuta tabija ovog ljeta je jedna od najposjećenijih lokacija u Starom Gradu. Hiljade posjetilaca do sada su uživali u koncertima Divanhane, Mustafe Šantića i Armina Muzaferije pod otvorenim nebom, u arhaičnom ambijentu Žute tabije i ponijeli najljepše uspomene opijeni zvucima sevdalinke.

Zahvaljujući festivalu “Sarajevo Sevdah Soiree” sevdah se na velika vrata vratio i u mahale Starog Grada gdje su prozori kuća ostajali otvoreni do kasno u noć kako bi se uživalo u zvucima sevdalinki.

Festival, koji je prepoznat kao novi važan dio turističke ponude grada, organizuju U.G. ZUP Bašćaršija i Turistička zajednica Kantona Sarajevo, a partner projekta je i Općina Stari Grad Sarajevo koja je i ovog ljeta domaćin brojnim domaćim i stranim turistima koji uživaju bogatoj kulturnoj baštini, gastronomiji, ali i kulturnim i zabavnim sadržajima.



Gosti uživali na Žutoj tabiji

O festivalu na Žutoj tabiji govorio je i predsjedavajući Općinskog vijeća Stari Grad Seid Škaljić, gostujući u programu Hayat TV-a:

“Općina Stari Grad Sarajevo će i u narednom periodu pružati podršku pozitivnim projektima kao što je Sarajevo Sevdah Soiree i nadam se da će postati tradicija. Žuta tabija je Sarajlijama bila poznata po ramazanu i iftarskom topu.



Predsjedavajući Škaljić govorio o festivalu

Sada, pored toga, dobija i novu prepoznatljivost po sevdahu. Mi nismo industrijska Općina, ali smo fabrika dobrih uspomena,” izjavio je predsjedavajući Škaljić.

Festival je završen spektakularnim koncertom benda Mostar Sevdah Reunion, dok je koncert sazlije Jusufa Brkića i Zanina Berbića zbog kiše morao biti otkazan.

Podrška poslovnim planovima mladih, nezaposlenih, žena i osoba s invaliditetom: **Jasna Rišljanin pokrenula krojačku radnju**



Jasna rašljanin dobila podršku za otvaranje krojačke radnje

Općina Stari Grad Sarajevo, putem Službe za lokalni razvoj i poslove mjesnih zajednica, realizovala je ove godine javni poziv za finansiranje i sufinansiranje najboljih poslovnih planova namijenjenih razvoju preduzetništva i zapošljavanju ranjivih kategorija stanovništva, među kojima su mladi, nezaposlene osobe, žene i osobe s invaliditetom. Uslove iz javnog poziva ispunilo je pet aplikacija, a jedna od njih je i 48-ogodišnja Jasna Rišljanin sa Faletića koja je bila nezaposlena i odlučila je zatražiti pomoć lokalne zajednice za pokretanje vlastitog biznisa.

Zbog korone bila prinuđena da zatvori radnju

Jasna je školovani tekstilni tehničar i ranije je bila vlasnica krojačkog obrta na Alifakovcu. Nažalost, zbog pandemije korona virusa i nepovoljnih uslova koji su



Sve vrste korekcija i novi komadi

tada nastali za male biznise poput njenog, bila je prisiljena da zatvori radnju i prestane sa poslovanjem. Krenuti ispočetka nije bilo nimalo lako, ali je odlučila da iskoristi šansu kada je u Općini Stari Grad u januaru ove godine raspisan javni poziv kojim se nudila mogućnost ženama poput nje da predlože poslovne planove i dobiju poticaj.

„Aplicirala sam na Javni poziv, koji je objavljen krajem januara ove godine, prošla sve potrebne procedure i dobila prijeko potrebna sredstva za pokretanje novog biznisa u iznosu od 8.000 KM. Da

nije bilo podrške Općine Stari Grad ne bih mogla ostvariti svoju želju i ponovo otvoriti radnju, ovaj put na Vratniku,“ ispričala je Jasna koja se zahvalila Općini i nadležnoj Službi za lokalni razvoj i poslove mjesnih zajednica što podržavaju zapošljavanje žena poput nje, te pozvala žene iz Starog Grada sa dobrim poslovnim idejama da se prijave na buduće javne pozive ove vrste

Jasnina krojačka radnja nalazi se u ulici Vratnik mejdan, a opremila je prije 15-ak dana i odmah počela sa radom. Iako još nije stigla ni da rasporedi sve mašine i materijale, kako kaže već je zatrpana poslom. „Zaista se nisam nadala da će ljudi odmah po otvorenju ovoliko dolaziti u radnju da traže krojačke usluge. Pored svojih stalnih mušterija od prije, imam mnogo novih ovdje na Vratniku, što mi je posebno drago“, ispričala je Jasna.

U njenoj novootvorenoj radnji u ulici Vratnik mejdan mogu se dobiti sve vrste krojačkih korekcija odjeće, ali i naručiti izrada potpuno novih komada odjeće, a cijene su pristupačne.

Obilježavanje značajnih godišnjica

Delegacija Općine Stari Grad prisustvovala ukopu 30 Srebreničana i odala počast žrtvama genocida

Posljednji smiraj pronašlo još 30 žrtava genocida • Najmlađa žrtva imala 15 godina, najstarija 65



Mirsada Smajić, Seid Škaljić, Muamer Mekić i Emir Bićo na obilježavanju godišnjice genocida

U Memorijalnom centru u Potočarima 11.07.2023. godine održana je komemoracija povodom 28. godišnjice genocida u Srebrenici, nakon čega je svoj posljednji smiraj pronašlo 30 žrtava stravičnog genocida počinjenog u julu 1995. godine. Uz hiljade građana i stotine domaćih i stranih delegacija, ovom događaju je prisustvovala i delegacija Općine Stari Grad koju su činili Mirsada Smajić, ovlaštena za obavljanje poslova iz nadležnosti Općinskog načelnika, Seid Škaljić, predsjedavajući Općinskog vijeća Stari Grad i vijećnici Općinskog vijeća Stari Grad Emir Bićo i Muamer Mekić.



Polaganje cvijeća, kolektivna dženaza i vjerski program

Prvi dio programa održan je u nekadašnjoj fabrici akumulatora u

Potočarima. Na komemoraciji se obratio veliki broj domaćih i stranih zvaničnika, ali i živi svjedoci i žrtve srebreničkog genocida. Hamdija Fejzić preživio je srebreničku golgotu prije 28 godina, ali mnogi njegovi članovi porodice i prijatelji nisu. On je danas predsjednik Organizacionog odbora za obilježavanje 28. godišnjice genocida u Srebrenici, ali i zamjenik načelnika Općine Srebrenica. „Nikada mi nije bilo lahko pronaći način kako da započnem ova obraćanja. Jer riječi koje izgovarate sa ovakvog mjesta postanu veće i od vas samih. I zato ih dugo biram, jer su najteže. A istina je uvijek prosta. Pravda je uvijek čista. Dovoljno je kazati 11. juli. Htjeli su da nas nema, zapalili su Podrinje, pobili i zadržali cijela sela, naše najbliže su pobacali u masovne grobnice, a preživjeli su prošli golgote stravičnih logora. Samo zbog svog imena, zbog svog porijekla. Međutim i nakon genocida i nakon pada Srebrenice, mi smo opet birali mir, i izabrali smo našu državu Bosnu i Herce-



U Memorijalnom centru održana komemoracija



U Srebrenici se pridružilo i vijećnik Alija Begić

govinu“, poručio je prisutnima Fejzić.

Nakon komemoracije i polaganja cvijeća na spomen-obilježju, uslijedila je kolektivna dženaza i vjerski program. Ukopano je 30 Srebreničana, među kojima je i nekoliko maloljetnika. Najmlađa žrtva je imala 15 godina, najstarija je u trenutku ubistva imala 65 godina.

Nevino stradale žrtve, šehidi i borci pali za ovu zemlju, nikada ne smiju biti zaboravljeni

Predstavnici Općine Stari Grad Sarajevo prisustvovali su i u prethodnom periodu obilježavanjima značajnih datuma i godišnjica stradanja na teritoriji općine Stari Grad Sarajevo.

Dan maloljetnog borca Općine Stari Grad Sarajevo

Na Trebeviću je 28.05.2023. godine, u organizaciji Udruženja maloljetnih boraca Stari Grad i uz podršku Općine Stari Grad Sarajevo, obilježen Dan maloljetnog borca Općine Stari Grad Sarajevo. Ove godine navršeno je 30 godina otkako je 30. maja, 1993. godine u akciji na Pitinim stijenama u direktnim borbenim dejstvima izgubio svoj mladi život maloljetni borac Armije RBiH Alija Oruč. Kao maloljetni borac sa Grličića Brda, na samom početku agresije Alija se priključio Armiji Republike Bosne i Hercegovine u odbrani grada. Prva jedinica u kojoj je bio je "Bosna 101", a nakon formiranja brigada, bio je u Prvoj brdskoj brigadi. Iako su mu zabranjivali učešće u akcijama, nalazio je načina da se tajno pridruži, te je učestvovao u gotovo svakoj akciji svoje brigade. U ime Općine Stari Grad događaju su prisustvovali vijećnici Općinskog vijeća Stari Grad, a među njima i Emir Bićo, od koga je i potekla inicijativa o održavanju obilježavanju 30. maja, kao Dana maloljetnog borca Općine Stari Grad Sarajevo.

„Moramo oživjeti kulturu sjećanja na borce iz Starog Grada, koji su se borili ovdje na Trebeviću. On je neopravdano zapostavljen, ovdje su se odvijali najkrvavije bitke u odbrani Sarajeva. U Starom Gradu je praktički sve počelo, prve granate su pale na Jarčedole, na Gazijin han, na Faletiće, na Vratnik, na Bistik. Ponosni smo što ovaj lokalitet ovdje nosi ime maloljetnog šehida Alije Oruča“, poručio je Bićo.

Godišnjica formiranja Druge brdske brigade Prvog Korpusa Armije RBiH dostojanstveno obilježena na Borijama

Na Borijama je 17.06.2023. godine, u organizaciji Udruženja boraca "Druge brdska brigada" Stari Grad Sarajevo, obilježena godišnjica formiranja Druge brdske brigade Prvog Korpusa Armije Republike Bosne i Hercegovine. Uz učenje Fatihe i minutu šutnje, ovo je bila prilika da se oda počast i izrazi zahvalnost onima koji su hrabro dali svoje živote u borbi za slobodu i odbranu Bosne i Hercegovine.

Predsjednik Udruženja Hasan Hadžialić istakao je da je cilj ovakvih okupljanja spriječiti zaborav na hrabre ljude koji su dali svoje živote za odbranu svoje domovine.

“Naš zadatak bio je braniti sjeveroistočne kapije Starog Grada, a naša zona odgovornosti obuhvatala je područja Kozje čuprije, Obhodže, Emirovice, Hladivoda i Pašinog brda. Međutim, djelovali smo i na području cijele Bosne i Hercegovine, gdje god smo bili pozvani, a najviše smo bili angažovani na Treskavici”, izjavio je Hadžialić. Dodao je da je u septembru, 1992. godine, na inicijativu prvog predsjednika Republike Bosne i Hercegovine, Alije Izetbegovića, brigada preimenovana u Drugu brdsku brigadu, a u februaru, 1995. godine u 152. brigadu.

Delegacija Općine Stari Grad, koju su činili Seid Škaljić, predsjedavajući Općinskog vijeća Stari Grad, vijećnici Emina Kiseljaković, Vedad Deljković, Muamer Mekić, Željko Ler i stručni savjetnik Službi za obrazovanje, kulturu i sport Senad Musić, položila je cvijeće kako bi izrazila duboko poštovanje prema hrabrim borcima.



Sa obilježavanja godišnjice formiranja Druge brdske brigade



Na Trebeviću obilježen Dan maloljetnog borca

Obilježavanje značajnih godišnjica

31. godišnjica masakra u ulici Ferhadija

U ulici Ferhadija, u blizini Gradske tržnice, polaganjem cvijeća na spomen-obilježje obilježena je 31. godišnjica od velikog masakra 27.05.1992. godine u kojem je život izgubilo 26 osoba, a više od 100 ih je teže ili lakše ranjeno. Ovaj masakr na samom početku agresije na naš grad i zemlju pokazao je da će u tom sukobu najveću cijenu platiti nedužni ljudi.

Tog dana, oko 09:55 sati, u tadašnju ulicu Vase Miskina sa položaja Vojske Republike Srpske ispaljena je minobacačka granata koja je usmrtila 26 osoba, dok njih više od 100 ranila. Ubijeni su: Nedžad Abdija, Ismet Aščerić, Ruždija Bektešević, Snježana Biloš, Predrag Bogdanović, Vladimir Bogunović, Vasva Čengić, Gordana Čeklić, Mirsad Fazlagić, Emina Karamustafić, Mediha Omerović, Bahrija Pilav, Mila Ruždić, Mile Ružić, Hatidža Salić, Galib Sinotić, Abdulah Sarajlić, Sulejman

Sarajlić, Sreten Stamenović, Srećko Šiklič, Božica Trajeri-Pataki, Vlatko Tanacković, Srećko Tanasković, Tamara Vejzagić-Kostić, Jusuf Vladović i Izudin Zukić.

Tužno sjećanje: Godišnjica stradanja troje djece iz porodice Bojadži

Na Sedreniku je 09.06.2023. godine obilježena godišnjica stravičnog zločina u kojem su, prije 31 godinu, ubijena četiri civila, od kojih troje djece iz porodice Bojadži. I ove godine tužnu godišnjicu smrti njihovih članova porodice obilježili su majka Halida i brat Muhamed Bojadži. Halida je doživjela ono što nijedan roditelj ne želi da doživi. Na Sedreniku, gdje i danas živi, 9. juna u njeno dvorište pala je granata i ubila njenu djecu: dvanaestogodišnjeg Mirzu i njegovog sedamnaestogodišnjeg brata Fehima, a ubijena je i Amina, kćerka njihovog amidže.

Godišnjica zločina u ulici Dženetića čikma: Ni 28 godina poslije, sjećanje na ubijene djevojčice ne blijedi

U ulici Dženetića čikma 10 obilježena je 28. godišnjica od ubistva tri djevojčice u dobi od 9, 11 i 12 godina, a događaju je prisustvovala i delegacija Općine Stari Grad.

Tog 25. juna, ratne 1995. godine, pripadnici Vojske Republike Srpske ispalili su jedan od hiljada minobacačkih projektila na Sarajevo u toku agresije. Granata je ispaljena sa područja Mrkovića oko 18 sati, kada je inače bilo mirnije i djeca su tada izlazila iz skloništa kako bi se igrala u blizini svojih zgrada. U ovom tragičnom događaju život je izgubila Sidbela Zimić (9), Amina Pajević (11) i Ljiljana Janjić (12), a teže i lakše je povrijeđeno još desetoro djece.



Obilježavanje godišnjice masakra u Ferhadiji




Počast žrtvama u Dženetića čikmi



Godišnjica stradanja djece iz porodice Bojadži



Položen vijenac na Trebeviću



Naziv institucije

Telefon

Policija	122
MUP Stari Grad	033/ 532-000
Hitna pomoć	124
Vatrogasci	123
Taxi Sarajevo	1515
Turistički informativni centar	033/ 532-606 i 580-999
Info centar Općine	033/ 233-184
Mjesne zajednice	033/ 265-526
Porezna uprava	033/ 555-481
Apoteka „Baščaršija“	033/ 272-300
Biro Stari Grad	033/ 557-247
Općina Stari Grad Sarajevo	033/ 282-300

Općinska služba

Telefon

Služba kabineta općinskog načelnika	033/282-400
Općinsko vijeće	033/282-313
Služba za odnose s javnošću i informacione sisteme	033/282-491
Služba civilne zaštite	033/282-395
Služba za investicije i komunalne poslove	033/282-417
Služba za urbanizam	033/282-316
Služba za imovinsko-pravne, geodetske poslove i katastar i stambene poslove	033/282-335
Služba za boračko-invalidsku i socijalnu zaštitu	033/282-397
Sektor za tehničke poslove i obezbjeđenje	033/282-452
Služba za opću upravu i inspeksijske poslove	033/282-357
Služba za finansije	033/282-427
Služba za privredu	033/282-359
Općinsko pravobranilaštvo	033/282-371
Služba za obrazovanje, kulturu i sport	033/282-365
Služba za lokalni razvoj i poslove mjesnih zajednica	033/265-525

-  Informacije
-  Policija
-  Parking
-  Prva pomoć
-  Toalet
-  Pošta
-  Banka

